

Donderdag 26 November

Skrifgedeelte: Jesaja 30:8-18 (AFR2020/AFR83)

Fokusgedeelte: Jesaja 30:18

Wag, want die Here wil aan jou genade betoon en Hom oor jou ontferm!

Van nature is ek nie 'n baie geduldige mens wat kan wag dat dinge moet gebeur nie! Maar in hierdie verse leer die Here my en ons almal om méér geduld aan die dag te lê, want die Here wil aan ons sy liefde en trou gee, Hy wil Hom oor ons ontferm.

Juda se misplaaste vertroue in Egipte om hulle van die Assiriese aggressor te red was 'n aanduiding dat hulle nie na die profeet Jesaja geluister het nie. Hulle vertroue op Egipte sal op niks uitloop nie (Jes. 30:7). Die probleem met Juda was 'n totale afwesigheid van geloof en vertroue op die Here. Hulle wou eerder gehad het dat Jesaja vleierende dinge (Jes. 30:10) aan hulle sê en ophou om hulle lastig te val met die Heilige van Israel (Jes. 30:11). Jesaja sê aan die ontroue volk dat hulle redding eerder lê in "bekering en rustigheid ... in kalmte en vertroue" (Jes. 30:15).

Ten spyte van Juda se sondige toestand wag die Here om aan hulle genade te betoon en Hom oor hulle te ontferm. In 2 Petrus 3:9, 10 staan: *"Die Here stel nie die belofte uit, soos party mense dink nie. Inteendeel, Hy is geduldig met julle, omdat Hy nie wil hê sommige mense moet verlore gaan nie, maar dat almal tot bekering moet kom."* Die middelpunt van God se ontferming oor ons as sondige mense is Jesus Christus se kruisdood!

Mag die Heilige Gees ons help om meer geduld aan die dag te lê en om na Hom te draai in vertroue deur te weet dat Hy ons swaarkry raaksien. Ons redding lê immers in Jesus Christus alleen, wat ons gehoorsaam deur bekering en rustigheid, kalmte en vertroue!

Sing: Psalm 2-1:1, 6

Dr. J (Jan) Lion-Cachet (Klerksdorp)